

樂城集卷之三十

宋眉山蘇轍子由著

明東吳

王執禮子敬
顧天敘禮初

全校

西掖告詞五十一首

太皇太后三代

曾祖瓊魏王

勅朕祇事 東朝朝夕咨焉以從政乃者躬見上帝升侑 神考

克以眇躬率行盛禮思所以仰報於 慈訓謂莫如追寵其先人

太皇太后曾祖某報蚤事章聖蔚為名臣智勇冠時忠勤沒世

澶淵之役卒致匈奴之和勳列鼎彝慶鍾任似賦政帷幄澤被海隅家傳異姓之王誓堅帶礪恩加千里之國昭示子孫其尙有知服此休命可

曾祖母李氏燕國

勅朕嗣守 鴻圖初見上帝推衍天澤丕冒海涯矧惟 文母之家尊爲外戚之冠恩自近始寵無與倫 太皇太后曾祖母某氏蘋藻之儀敬而不瀆珩璜之節動必以時作嬪大家肇錫餘慶宜新湯沐之奉以追窈窕之榮 音徽永存尙克嘉此可

曾祖母李氏韓國

勅和熹之慶兆自高密外奮武功中篤淳行閨門之風比隆儒
維我 聖母鍾慶烈武積累之厚追配古人宜其室家並受光寵
太皇太后曾祖母某氏夙被女訓有鵲巢之風能使君子成羔
羊之行德配圖史福流子孫肆予熙事之成宜錫大邦之寵服我
新命賁爾舊阡可

祖繼隆楚王

勅朕惟 祖宗功臣能父子相繼勳業不墜者惟曹氏高氏克顯
於世而皆篤生 聖女輔成 二宗之內治今予 神母實親庶
政均覆內外是用寵其先人以慰慈心 太皇太后祖母某武力自

奮家聲益茂出擁旄節入董環衛與漢辛氏武賢慶忌唐李氏西
平大涼較長挈大罔有慙德茲予大享於合宮思與懿戚共享其
福大邦名城爾實宜之肇封荆楚以福爾後可

祖母康氏魯國

勅古之命婦貴從其夫維克有後則以其子矧予天下之母內極
三世之尊可無追崇助我孝治 太皇太后祖母某氏育德名族
作嬪大邦象服之盛配德於山河彤管之嚴比潔於圭璧比列荆
河之壤追賚九泉徙封少昊之墟益彰異數追遠之厚予何吝焉

可

祖母郭氏豫國

勅朕於舊勳之家無所不厚矧維坤德之重恩何以加內殫孝敬之深心庶幾慈仁之一喜比緣大賚思極追榮 太皇太后祖母某氏保節不勤宗族稱善姑章安其能養子孫法之不忘茲用推惠澤於總章易隆名於大國漏泉之慶尙克享之可

祖母全氏秦國

勅朕篤於奉天禮極嚴父思其志意莫如念母之深寵其祖先尙有追封之典 太皇太后祖母某氏婦德成於早歲母儀著於當年宜其室家施及宗黨鳴鳩懷均一之性翬翟見委蛇之容沒而

不忘易舊封於西土傳之罔極告新命於宗祧可

父遵甫唐王

勅高密之仁其報在訓汾陽之功其報在曖維其子孫不能專有
其福實生聖女以母天下漢唐之盛曠無與倫 太皇太后父遵
甫魏王之孫而楚王子也生而富貴動由禮義才甚高而不試
德雖隱而自彰命之不融中道而殞祚我 神母實代天工厚德
載於三朝貴名高於十亂仁民愛物每以生靈而爲心克已復禮
深惡外家之太盛臨御期歲遂安四方和熹才有餘而德不充懿
安福至厚而功不著欲報之德不知所從茲予祀帝於總章大霈

寵恩於海寓追崇之典所不敢忘改封堯都增寵家廟可

母曹氏吳國

勅朕以四海之富爲 二宮之養猶朝夕歉然以爲未足推予此
心以知 聖母追遠之念罔有窮已謂將成就其美莫如褒顯其
先 太皇太后母某氏生於功臣之家綽有女士之德恭儉廉退
孝友慈祥實生太任作合英祖方其造舟以迎於渭教成而結其
禱母育四方二紀於是君臨百辟期年有成推迹本源安可忘報
改封南國以賁九泉庶乎有知服我新命可

母李氏秦漢國

勅尊之而欲其貴愛之而欲其富聖人非私其親也情之所厚禮
有必然眷予外戚之小君蚤與唐國之內治恩寵之異中外莫先
太皇太后母某氏奕世簪裳生知法度鵲巢無愧於居室麟趾
自致於多賢愛均七子之仁養及中宮之貴迨此臨軒之日方其
授几之辰化被族人貴震海內疏封二國蓋近世之罕聞壽考百
年均本朝之多福可

皇太后三代

曾祖敏中申王

勅昔我 皇祖光宅天下求賢以自輔一時公相皆世之豪傑子

孫顯榮歷世不墜篤生淑女作配皇極究觀本源蓋非一日之積也
皇太后曾祖某光大篤實真漢相之風富貴壽考有天人
之福畫像原廟銘功太常方均慶於合宮宜易封於成國服我休命
祚爾後昆可

曾祖母宋氏魏國

勅朕親祀合宮仰以陟配昭考追文王之典俛以大賚臣工侈上
帝之福眷予母族之重實居戚里之崇豈無異恩以廣慈念

皇太后曾祖母某氏靜而守禮存江漢之風動必有儀儼山河之
象德洽宗黨慶流子孫疏封有居於今歷歲肇新畢萬之國以寵

向氏之祧可

曾祖母張氏魯國

勅昔向氏之祖位列丞弼世方平寧在位正直有羔羊之風退食
委蛇本鵲巢之致積是懿德逮其曾孫嬪干有虞遂母天下寵光
所被中外莫加 皇太后曾祖母某氏躬服孝慈動由禮義其歸
以百兩之眾其貴有六珈之儀壽雖止於中身慶實鍾於來裔推
予享帝之賚錫以保魯之封尙克有知服此休命可

曾祖母宋氏楚國

勅朕躬享昊天升侑

神考外推巖訓之教內懷將母之誠厚撫

其家追三麻祖下迨閨幃之懿咸加封爵之崇躬孝帥民朕無所愧皇太后曾祖母某氏嚴於正家動必由禮采蘋以其公侯之事親桑以致袞冕之華藹然令猷克光來葉肇新封於荆楚告休命於烝嘗尙克有知膺此異數可

曾祖母王氏陳國

勅朕尊尊以教敬親親以教愛非予戚里之舊孰能兼受斯禮皇太后曾祖母某氏毓德柔嘉執禮嚴靖服膺保傅之教究知臣妾之勤內無怨言家有餘慶循致坤元之福遂正母儀之尊方毖祀於總章旣大賚於寰海易爾句踐之國錫以太昊之墟恩寵有

加永世無墜可

祖傅亮榮王

勅爵爲上公周制也王以異姓漢法也朕兼采周漢之舊以寵親賢之家因大享之告成錫異恩而追遠皇太后祖某故相之子生而顯榮躬蹈儒者之風行無世祿之過積累之厚下迨子孫褒寵之優肇建邦邑因其奄受北國之命寵以劔立南面之尊朕將以慰母心爾亦世享廟祀可

祖母吳氏越國

勅申王諸子皆列貴仕榮國不耀中正郎官潛德之深其報布後

及孫而顯母儀天下德澤流行室家光榮 皇太后祖母某氏珪
璋之行著於族人蘋藻之恭宜於祖考貴始封邑恩錫有邦茲因
總章之祀推廣隆祐之孝裂會稽之奧壤增湯沐之舊封尙克有
知服我休命可

父經周王

勅申伯之德參於周召之間褚公之賢載於王謝之列恩非專於
戚里名自顯於搢紳今予外家庶幾前烈 皇太后父某絕出世
胃交友儒林休聲藹然多福自至卧淮陽之近輔表東海之雄藩
清淨不煩得承流之要忠悃深至有入告之常壽止中身慶在隆

祐茲因嚴父之祭起予念母之心大啟周南之封以慰宮中之孝
國有常典匪子所私可

母李氏豫國

勅 先皇帝刑于室家以御于天下非獨外有輔佐而中宮之懿
實與有勞煥乎四德之充豈惟一世之積 皇太后母某氏敦閱
圖史服勞組紉肅雍娣姒之間祇敬姑章之奉誕生淑女之淵穆
不及君子之榮華初建長秋閔追榮之已遠繼開隆祐知餘慶之
方遐乃者熙事告成 龐恩廣被肇錫荆河之國以新脂澤之田賁
於九原嘉此休命可

母張氏冀國

勅朕聞後庭以德進則外戚以福終周之任姒旣克保其國而漢之薄竇亦能全其家至哉坤元實相內治宜爾外家之慶仰同帝室之休 皇太后母某氏性稟淑均德推靖慎因豫國治家之遺迹追慈徽毓德於妙年命之不融乃止中壽比緣茲祀啟湯沐於堯都錫以命書貴烝嘗於家廟滂泉之澤奕世不忘可

皇伯世儔贈本國軍節度觀察留後追封奉化郡公

勅唐之藩郡以留後爲重周之列國以諸公爲貴國朝兼用古制外以待將帥之功內以優宗室之懿非此二者未嘗授焉具官某

貴而能降富而不盈孝弟之美著於親黨儼恪之容見於朝會沒身不試遺範不忘寵加兩使之貳優以五等之貴魂而有知嘉此休命可

越國賢惠長公主追封大長公主

勅王姬之貴而能執婦道以成肅雍之美朕嘗聞召南唐棣之詩矣永惟皇祖之慶篤生淑女之賢賦命不融中道而沒哀榮之典茲何敢忘故越國賢惠長公主襲寵宮庭生知禮義儀降王后有車服之崇德配君子稱室家之懿遠茲享帝之澤推予尊祖之誠大長之稱寵榮斯極追錫成命以賁九泉可